

Mehefin 19, 2020.

Annwyl Riant/Gofalwr,

Yn gyntaf, hoffwn ddiolch i chi am eich cefnogaeth, eich dealltwriaeth a'ch amynedd dros y tri mis diwethaf. Rwy'n ddiolchgar i chi am bopeth rydych wedi'i wneud i gynorthwyo dysgu eich plentyn ac i gefnogi ysgol eich plentyn a'r awdurdod lleol ar yr adeg anodd hwn.

Diben y llythyr hwn yw rhoi rhagor o wybodaeth i chi ynghylch ail-agor ysgolion.

Ailgydio, Dal i Fyny, Paratoi

Mae staff ein hysgolion wedi bod yn arloesol yn y ffordd y maent wedi parhau i addysgu ers yr 20fed o Fawrth; mae'n amlwg nad yw dysgu yn adnabod ffiniau ac na fydd yn cael ei gloi i lawr! O ganlyniad i gyhoeddiad diweddar y Gweinidog Addysg o ran ailagor ysgolion, mae'r awdurdod lleol yn awyddus i weithio gydag ysgolion a rhieni/gofalwyr i sicrhau bod pob disgybl yn elwa ar gyfle i fynd yn ôl i'r ysgol, i ddal i fyny â'u cyfoedion ac athrawon, a pharatoi ar gyfer y flwyddyn ysgol newydd.

Mae'n annhebygol y bydd ysgolion yn dychwelyd i'r ffordd yr oeddent yn gweithredu cyn y clo mawr am gryn amser; fodd bynnag, mae angen i ni fynd ati i ddefnyddio'r trefniadau dal i fyny fel y camau cyntaf tuag at ysbrydoli a chyffroi disgyblion am ddysgu unwaith eto.

O ddydd Llun y 29^{ain} o Fehefin, bydd ein hysgolion yn croesawu disgyblion yn ôl i fynychu sesiynau penodol. Ni fydd pob dysgwr yn dychwelyd ar unwaith, a phan fydd yn dychwelyd, gall y diwrnod ysgol ddechrau a gorffen ar adegau gwahanol i ddysgwyr gwahanol.

Mae Penaethiaid a'u staff yn paratoi ein hysgolion i sicrhau eu bod eu yn cydymffurfio â chanllawiau lleol a chenedlaethol ac yn sicrhau eu bod mor ddiogel â phosibl i ddisgyblion a staff. Mae'n amlwg y bydd y cyfyngiadau a osodir ar ysgolion yn cael eu codi'n ofalus a bydd pob ysgol unigol yn gwneud penderfyniadau lleol ynglŷn â sut y byddant yn ail-agor. Rydym yn disgwyl i'r broses hon fod yn ddatblygiadol ac wrth i ysgolion a'u cymunedau fagu mwy o hyder a rhythm, byddant yn symud ymlaen tuag at dderbyn hyd at eu capasiti newydd er y gallai gymryd amser i gyrraedd y lefel hon o weithredu.

Rydym yn disgwyl i'ch ysgol gysylltu â chi i sicrhau eich bod yn deall, cyn gynted ag y bo modd, sut y mae amgylchedd, gweithdrefnau a gweithrediad yr ysgol wedi'u haddasu er mwyn darparu ar gyfer, mor ddiogel â phosibl, ddychweliad disgyblion i'r ysgol. Bydd y trefniadau hyn yn cael eu hadolygu'n rheolaidd a byddant yn cael eu newid lle bo angen, gyda diogelwch y disgyblion a'r staff wrth wraidd yr ystyriaeth.

Gareth Morgans, BAdd/BEd; MGw/MSc

Cyfarwyddwr Addysg a Gwasanaethau Plant,
Neuadd y Sir, Gaerfyrddin, Sir Gaerfyrddin SA31 1JP
Director of Education & Children's Services,
County Hall, Carmarthen, Carmarthenshire SA31 1JP



BUDDSODDWYR | INVESTORS
MEWN POBL | IN PEOPLE

Mae croeso i chi gysylltu â mi yn y Gymraeg neu'r Saesneg

You are welcome to contact me in Welsh or English

Gwerthfawrogwn y bydd rhywfaint o bryder ac ansicrwydd ar hyn o bryd. Bydd ysgolion yn cysylltu â chi dros y pythefnos nesaf i'ch hysbysu am eu cynlluniau ac i roi'r sicrwydd sydd ei angen. Bydd gwybodaeth yn cynnwys, ymhlith pethau eraill-

- *Cynllun ysgol gyda gwybodaeth o ran mynedfeydd, gadael a symudiad dysgwyr o fewn yr adeilad.*
- *Gwybodaeth mewn perthynas â chyrraedd yr ysgol- amser, protocol, cofrestru*
- *Dyddiad ac amserau'r sesiwn y disgwylir i'ch plentyn fynychu.*
- *Trefniadau o ran cinio- os bydd eich plentyn yn mynychu am ddydd llawn bydd angen pecyn bwyd.*
- *Cadarnhad o ran gwisg ysgol- penderfyniad lleol i'r corff Llywodraethu fydd hwn.*
- *Gwybodaeth o ran y broses os bydd plentyn yn mynd yn sâl yn ystod y dydd.*

Unwaith eto, rwy'n awyddus i wneud popeth posibl i dawelu eich meddyliau ynghylch ymdrechion yr awdurdod lleol i gefnogi lles emosiynol a chorfforol y dysgwyr. Rydym ni'n gweithio'n agos gydag ysgolion a'n partneriaid i sicrhau bod canllawiau a chymorth ar gael i gynorthwyo eich plentyn i dychwelyd i'r ysgol.

Felly, pan fydd eich plentyn yn dychwelyd i'r ysgol, bydd ffocws clir ar les ac ar fwynhad o ddysgu yn yr awyr agored, ble a phryd mae hyn yn ymarferol. Mewn ysgolion uwchradd, efallai y bydd ffocws yn y pen draw, ar gyfer rhai grwpiau blwyddyn, ar gefnogi dysgu, gan ystyried gofynion academaidd y flwyddyn ysgol sydd ar ddod.

Oherwydd y rheoliadau a osodwyd gan Senedd Cymru ar bellhau cymdeithasol, bydd ein darpariaeth cludiant rhwng y cartref a'r ysgol yn cael ei gyfyngu'n sylweddol. Mae disgyblion yn cael eu hannog i gerdded neu feicio'n ddiogel i'r ysgol lle bo'n bosibl, ac os oes angen cludiant, i rieni wneud pob ymdrech i'w ddarparu.

Mae'n bwysig nodi, yn ystod y cyfnod hwn, eich bod yn rhydd i benderfynu danfon eich plentyn yn ôl i'r ysgol ai peidio. Rydym yn gwneud popeth a allwn i sicrhau bod amgylchedd yr ysgol mor ddiogel â phosibl i ddysgwyr a staff. Os byddwch yn penderfynu peidio danfon eich plentyn yn ôl i'r ysgol yn ystod tymor yr haf, ni fyddwch yn cael eich cosbi. Os byddwch yn dewis peidio ag anfon eich plentyn yn ôl i'r ysgol, bydd eich plentyn yn parhau i dderbyn yr un cymorth o'r ysgol a gafodd hyd yn hyn.

I gloi, hoffwn ddiolch ichi i gyd, unwaith eto, am eich cefnogaeth barhaus ar adeg anodd iawn.

Gareth Morgans

Am ragor o wybodaeth ac arweiniad ar ail-agor ysgolion ewch i-

www.sirgar.llyw.cymru/addysg

Gareth Morgans, BAdd/BEd; MGw/MSc

Cyfarwyddwr Addysg a Gwasanaethau Plant,
Neuadd y Sir, Gaerfyrddin, Sir Gaerfyrddin SA31 1JP
Director of Education & Children's Services,
County Hall, Carmarthen, Carmarthenshire SA31 1JP



BUDDSODDWYR | INVESTORS
MEWN POBL | IN PEOPLE

Mae croeso i chi gysylltu â mi yn y Gymraeg neu'r Saesneg

You are welcome to contact me in Welsh or English